

# Kórósi

Ísu wíyómpa'a iyówana Póro moórá-waai úmai sísamaifakemba kae'-áátáyá'íyo miyáumai-aatai maisuwéna maanáái agaimakáíye. Póro Ísun-ai simátíma'mae iyúnkakemba Rómu-naopa'a ándáfa'a ánkawana méropa'a moóráwígon-awi'a Épáfarasi téna séna Kórósi-naopa'a Ísuni aampa'ó kun-kwáásífímbá karo'-áái wésimatimewe siyáíye. Maarán-káró'-áái sésa Maníkó isasá waási owasá afufumpimbá fasi'aéntómbá méraawi-tuwi'a mósá máráro sésa Ísuntafesa ímba Fasi'aénkómá póna wíyómpaken-kisau-waasiyaamban-íye sésa tuwímbai-tontafesa ímba naaró sésa kentú-aoisaamba wíyóro símai miyán-áái wésewe kosúwana Póro iséna miyán-áái tuwáíwae séna maanáífái agaimái tuwówasarai Tíkíkaasiye Ónísímasiye mátímakaaye.

---

**1** <sup>1</sup> Kemá Póro maanáái maanáífáífímbá agai-timúmpo ísáaro. Moóráwígon-awi'a Tímóti kentáási waásigo kesé'a méraisa'a agai-timúmpo ísáaro. Maníkó wení imáyáafinkemba kentáféna séna aantá-waasi-í'a éma Ísu Káráísitin-ai kosimátíma'mae núwo séna si'mákaifo ísáaro. <sup>2</sup> Kórósi-naopakewi Maníkóni waási Ísu Káráísitiye'o kááísamaimo méraawi wembá ímba aúwáamba fasi'amaimo méraawi ísáaro. Maníkó kentáásifowa úwoi túwa'nai ena faru wéuwatinkaintafe'a inái sune.

<sup>3</sup> Kembiwísáfé'o imáyáamo é'o inaimó súnnda Maníkó Ísu Káráísitin-afowámpá'á súwi sune. <sup>4</sup> Ísu Káráísitin-aaisafe'a timankúnkúmbo é'o Maníkóni waási seyaafá'-wáásífímbó kentirumbó wétimen-aaima isé'a mindásafe'a Maníkómpá'á súwi sune. <sup>5</sup> Aifa'á moóráwígon-awi'a Épáfarasi érai'-aai ásé-ai simátimuwa'a ísaraanka'a wíyómpa'o Maníkómó to'mayaa úmakaimba imáyáa é'a amu'maré'o méraamba pó'a Ísu Káráísitin-aaisafe'a timankúnkúmbo é'a Maníkóni waásifimba kentirumbá wétimewe. <sup>6</sup> Aifa'á Maníkó úwoi túwa'nai in-ááímá simátimuwa'a isé'a sé'a érai'-aain-íye suwaná minááígó kawé'o uwátínkaraintemba minásé-ááígó seyaafá'-márafá'á wété éna kawé'a wéuwatinkaiye. <sup>7</sup> Épáfarasi minásé-ááímó simátíma'mae iyáíwai wembá sirumbó ámakaundawi keséta kawé-kísáú wémaiwai súwa'nai ena kembiwífímbá Ísu Káráísitini kísau kowémaena ímba ifátuwena <sup>8</sup> tasimásimena séna Maníkóni ámútanko Kórósi-waasi imáyáa tímísasa waási tirumbá timésa wétuwa'nai-owe siyáíye.

<sup>9</sup>Súwa'a isé'a inai símae wéiye'a inai fínkémbá maarán-áái sune. Maníko wembó arááimo wétaisama sama kátinkaina'a awánewana Maníkóni ámútanko kawé'-ímáyáá timína'a <sup>10</sup>Fasi'aénkómbó arááimo wétaintemba íyana tuwánéna aamoí ina'a miyáumai mémpinkemba fí'o-fi'on-kawé-kisau wémae'a Maníkómbá kawé'-úmaimo wéawanaantafe'a inai sune. <sup>11</sup>Maníko wení fasi'aémbá fí'onka'ma'mai-fasi'aentamba fasi'átinkainana umbai-tántáá'ó kempá'ó tinda ímba mindásafe'a imáyáa é'a fasi'ámai mérai yantafena wení fasi'aémbá timínana <sup>12</sup>Maníko wení waásisafena to'mayaa úmai sámó kain-áémpá'ó káráwi yain-aempa'a makáimba kawé'á uwátinkena to'mayaa úmakaimba timíniye. Mindásafena kentirunkó kawé'á ina'a Maníko kentáásifowampa'a súwi síyantafe'a inai sune.

### Káráisitini áwáuwe wení kisaugon-aai.

<sup>13</sup>Waántáwanko kumeu'ó in-áémpákéwíni fasi'aénkó ta'ótokaimpinkemba Maníko siyé nasa ááninko wen-ímáyáámó iwái káráwi yaipa'a mósinkowanasa <sup>14</sup>ááninko sáwí-imayaagomo ta'ótokaimpinkenta faúsinkenasa kentáási sáwí-imayaa maisíyukaiye. <sup>15</sup>Maníkón-ane'ó súrantantaamo ímbo awánáúndasa Maníkómó méraintemba Ísu Káráisiti mérai waintaamo awánáúndasa mindá Maníkóntá wéawanaumne. Maníko wíyóne marawémó ímbo úmakonka'a Ísu Káráisiti ména úmakon-tantaakomba seyaafá'á íyáákaraiye. <sup>16</sup>Maníko súwana Ísu Káráisiti seyaafá-tántáá'á úmarena wíyómpa'o wérain-tantaa'e marapá'ó wérain-tantaa'e étaamo awánáúnda-tantaa'e íntaamo awánáúnda-tantaa'e wíyómpa'o káráwi yaawiye fasi'aénkwáráwíyé óraa'o méraawiye miyán-tántáá'á seyaafá'á úmakaiye. Ááninkon-awi'o mósá maráiyantafena Maníko súwana ááninko miyán-tántáá'á seyaafá'á úmakaiye. <sup>17</sup>Seyaafá-tántáá'ó ímbo wéronka'a ááninko maé'émba isaná seyaafá-tántáá'ó úmakaimba wení fasi'aéntámbá ta'ótokaisana wenamááramaa'a wéraiye. <sup>18</sup>A'nómpínkén-ímáyáágó seyaafá'-áurá'ó káráwi yaintemba Maníkóni waási Káráisitini-áúraamba owaná wemá ti'nónkáámbá éna káráwi yaaiye. Wemá aifarí'a éna seyaafá'nánká íyáákaindasafena wení waásiya'o káráwi yaawai póna wení waási aúí'a úmai méraawini áwáuma póna Maníko pukáimpinkemba íyáfasinankaraiye. Mindásafena wemá úmakain-tantaakomba seyaafá'á íyáákaraiye. <sup>19</sup>Maníkóni imáyáafinkemba wení fasi'aémbá seyaafá'á Ísu Káráisitimpimba wéraisana <sup>20</sup>Maníko imáyáa éna séna kesááninko aaraa-táiyá'á puwínana wení naaemó kumínda seyaafá'nánká faru uwátínkáanasa wíyómpaken-tantaa'e marapákéntántáá'é símai kááísatinkaanasa kesópa'a faru úmai ménaawe séna sáwí-imayaagomo ta'ótokaimpinkenta faúsínkaraiye.

<sup>21</sup>Maníko minááímá kembiwísáfénawara'a siyáiyé. Ááéma sáwí'a é'a sáwí-imayaa wée'a pó'a Maníkóni némpa'a mé'a wení namuro-

wáásíyáámbá úmai maé'ómbanifo <sup>22</sup> ááninko marapá'á kumbéna pukáimba póna mindásafena símai kááísatinkena Maníkóndé-i'a uwátínkarainana sáwí-aaima kempímbá ímba wérainana aafimbó maitinkáinda-aai ímba wérainana Maníkómpá'ó mótinkaindasafena pukáiyé. <sup>23</sup> Ááninko miyá uráifo aifa'á Ísu Káráísitin-aai ásé-aai ísaraanka'a timankúnkúmbó é'a Maníkómó to'mayaa úmakaimba imáyáa é'a amu'maré'a méraamba póna minááímó fasi'ámaimo imáyáamo úmae iyé'o ímbo kae'-ímáyáámó é'o wenká'ó timankúnkúmbó íyanamo éna Maníkón-ááninko kembiwí Maníkómpá'á mótinkainana kempímbá sáwí-aaima ímba wérainana aafimbó maitinkáinda-aaima ímba wéniye.

### Fasi'aénkóní waásimo túwa'nai uráin-aai.

Kemá Póro minásé-ááígóní kísau-waasi únasa seyaafá'-máráfá'á simátíma'maesa wété wéowe. <sup>24</sup> Wétuwa'nai-unda sí'o iní'a uwásínkáámbanifo sirunkó kawé'á wéiye. Ísu Káráísiti kentáféna séna kesí waási kesúwawaakaamba úmai méraan-kwaasi wétuwa'nai-indara'a áí'o índa-i'a uwánkanaawe siyáinka'a minúbái-tántáá'á kempá'á tiyáisa'a minkísáú maúndanifo wétuwa'nai-unda sí'o iní'a uwásínkáámba sirunkó kawé'á wéiye. <sup>25</sup> Maníkóní waásiya'a kísau maé'a wenáái seyaafá'á simátíma'mae iyé'a kawé'á uwátinke'a túwa'nai ondasáféna Maníkó íyáfasisinkaraiye. <sup>26</sup> Ááéma Maníkó minááímá aúpá'ó makáimba ááemo paápé urón-kwaasiye minká'ó paápé uráan-kwaasiye ímba ísaraawana káfé'a Maníkó wení waási wéaraatimiye. <sup>27</sup> Maníkó to'mayaa úmai aúpá'á makáimba imáyáa éna séna seyaafá'-wáásísáfé'a fí'oran-kawe-tantaa'o to'mayaa úmakaunda aráátimenaumne siyáiyé. To'mayaa úmai aúpá'ó makáimba maarán-iyé. Káráísiti kempímbá méraimba pó'a wesé'a fí'ora-samo kaipa'á méranaawe. Maníkó miyán-ááímá isáíwae séna káfé'a wení waásisa wésimasimiye. <sup>28</sup> Mindásafeta seyaafátá Ísu Káráísitin-aaisa wésimatimune. Seyaafátá Ísu Káráísitiye'o kááísamaimo mésa táákaefaen-kwaasiyaamba úmai mésa Maníkón-aaisafesa fasi'ámai imáyáa wéesa méraiyantafeta Maníkómó símakain-kawé'-imayaasanta simátíma'maeta wéiyeta séta káráwiyoro sune. <sup>29</sup> Minkísáú áúwara-kísau intáfé'a siyáántán-kwiyé'a wémaumne. Ísu Káráísiti fí'ora-fasi'aemba wésimisana mifásí'áénkó kawé'á uwásínkáisa'a siyáántán-kwiyé'a minkísáú wémaumne.

**2** <sup>1</sup> Maanááímó simátíménda ísáaro. Kembiwísé Réóndísiyaa-naopakewiye kembó ímbo suwánaraawiye óraa'-imayaa é'a inái sé'a kawerá úmaiya méraao-imayaa wé'e'a óraa-kisauraamba úmai wémae'a <sup>2</sup> kesé miwísé'a fasi'ámai méraiyantafena sirááíma wétaiye. Moórá-mora-waasi kentirumbá timé'a mimbórá-ímáyáa é'a Maníkón-aai ísámai kawé'á é'a ímba kae'-ímáyáa é'a fasi'ámáimo méraiyantafena sirááíma wétaiye. Maníkómó aúpá'ó makéname aráátímakaimba minááígóní áwáuma

Ísu Káráísiti isaná minááígómbó kawé'-úmaimo isáiyantafena sirááíma wétaiye. <sup>3</sup>Maníkóní kawé'-ímáyááwé kawé'-ááiyé Káráísitimpimba wéraimba Káráísiti weyáá imáyáasa símísata wéisaumne. Minááímó isáiyantafe'a wésimatimune.

**Fasi'aénkóe'o takááísamaimo mé'a maé'mae'a úmae íyóro-aaí.**

<sup>4</sup>Tuwímbai karo'-ááímá kentirumbá faiyaráíya'a kawé'-ááín-íye sé'a arááíwáéfo sé'a minááímá wésimatimune. <sup>5</sup>Kembiwísé'a ímba méraumpo ándáfa'a némpa'a méraundanifo kembiwísáfé'a imáyáa wéune. Ísu Káráísitin-aaisafe'o fasi'ámai timankúnkúmbó é'o mimbórá-ímáyáámó é'o méraantafe'a kembiwísáfé'a imáyáa únana sirunkó kawé'á wéiye.

<sup>6</sup>Minááímá isáiyantafe'a óraa-kisau maiyáunda pó'a Ísu Káráísitiye'a tamé'a sé'a kentáásí Fasi'aénkón-íye sembá pó'a wesé'o takááísamaimo mé'a maé'mae'a úmae íyóro. <sup>7</sup>Taaigó ánú'o marafímbó kuménamo taaimó ta'ótóráísanamo fasi'ámaimo wéraintemba Ísu Káráísiti kembiwísé'a méraina'a fasi'ámai mé'a wenááísafe'a timankúnkúmba úmae iyíyana kentirumpimbá óraa'a íníye. Moóráwigon-awi'a Épáfarasi Ísu Káráísitin-aaí simátimuwa'a isé'a fasi'aén-ímáyáá wée'a aamoí úmae íyóro.

<sup>8</sup>Tuwímbai karo'-ááímá simátimesa ááéraan-kwaasiti aambá arááíwaesa waántá-waasiti aambá arááíwaesa mindá ímba Ísu Káráísitin-aaí finkemban-ifo waásiti

máyáafinkemba úwoi-aaima pósa karo'á simátinkesa ta'ótóráafo káráwiyoro. <sup>9</sup>Maníkóní fasi'aémbá seyaafá'á Káráísitimpimba wéraisana waási kunúkáisa'a <sup>10</sup>wesé'a kááísamai méraawana fasi'aémbá tímísa'a mifási'áénkwárá'á sásá'-í'a úmai méraawe. Wemá káráwiyaawiyale fasi'aénkwáráwiyá'é seyaafáká'é káráwiyena fasi'aémbá tímísa'a sásá'-í'a úmai méraafo tuwímbai karo'á simátinkesa ta'ótóráafo sé'a káráwiyoro.

<sup>11</sup>Yúndaa-waasisa Maníkóní waásisa úne séta súsa kárámaisa araenáénta wéumpo kembiwí ímba miyá wéfo kembiwísáféna Ísu Káráísiti maará uráíye.

Kentí sáwí-imayaago ta'ótokaimpinkemba faútinkena wenane'á mékááísatinkaimba pó'a Maníkóní waásin-owe. <sup>12</sup>Ísu Káráísiti pukáísasa utámakaafo kembiwí nombó máemba púwówasamo utámaráánteni'a wéowe. Maníkó Káráísitimba pukáimpinkemba íyáfasinankowa'a mindásafe'a sé'a érai'a fasi'aémbá tokéna miyá uráíye sé'a Káráísitiye'a kááísamaimo méraantafe'a íyáfasintinkaanteni'a wéiye. <sup>13-14</sup>Kembiwí fí'onkaa-waasi ombá sáwí'a wée'a sáwí-imayaasafe'o tirááísafe'o wéon-ambo arááíwakaantafe'a Maníkóní némpa'o máúmbanifo Maníkó Káráísitinte'a kááísatinkena aúí'a uwátínkaraiye. Kesáá Maníkóní

ámáámba ímba ísámai kawetá wéowananasa kesáámó sáwí'o ówándasa aúfáímba agaimarówana kentáásí sáwí-meyamba kentááfá'á ímbo tíndasafena Ísu Káráísiti aaraa-táiyá'á pukáimba póna kesáámó sáwí'o ówándasaawe sáwí-imayaawe Maníkó maisiyuwénasa Ísu Káráísitimbo pukáimpinkembo íyáfasinankaraintemba íyáfasisinkenasa aúí'a uwásinkenasa kentáásí sáwí-imayaasafena ímba imáyáa úmae wéiyiye. <sup>15</sup>Ísu Káráísiti aaraa-táiyá'ó pukáinka'a waántáwankoni fasi'aéné wení kísau-waasiti fasi'aéné maisuwéna íyáákaraimba tiyésamo waásimo tínkankesamo tiyáántámbo taantembá Ísu Káráísiti miyáumai seyaafá'-wáásí túranka'a íyáákaraiye.

<sup>16</sup>Ísu Káráísitimo kembiwísáfénawe sénamo uráintafe'a karo'-ááímá simátínkáafo sé'a káráwiyoro. Tuwímbai-waasi tuwímbai-tomba aambá faiyésa óraa-kanaa aambá faiyésa wíyómbo taeyain-kánáa aambá faiyésa sambaatiyá'á aambá faiyésa miyán-tántáá'á aambá fáíkaafo kembiwímó miyán-tántáákómbó ímbo arááíwaiyasamo aafimbó maitinkáiyamba ímba ísáaro. <sup>17</sup>Mintántáá'á ánaembo paapé índa-tantaakoni waamé'a úmai aráátímakaimba mintántáákóní áwáuma Ísu Káráísiti éna é'a paapé uráiyé.

<sup>18</sup>Tuwímbai karo'á sésa waási sáwísamban-iyé sésa wíyómpaken-kisau-waasi-imayaa mósá maré'a aamoín-oro karo'ó sembá miwí táái ímba ísáaro. Miwí kaainkáámbó awánaan-aaima wésimatimesa sésa mindásafeta seyaafá'á íyáákaraumne sésa miwítí

sáwí-imayaafinkemba karo'-ímáyáa wéesa miwí túma maimaé iyésa <sup>19</sup>Ísu Káráísiti kentáárá'ó káráwiyaiwaimba ímbo ta'ótóráámba áúkaawe. A'nónkó seyaafá'-áúwáwááká'ó káráwiyaisanamo ánúnkomo seyaafá'-áúfá'ó ta'ótokaisanamo óraa'o intembá Káráísiti wení waásiya'a káráwimai ta'ótokaisasa Maníkóní imáyáafinkemba óraa'a wéofó minkáró'-wáásí Káráísiti kentáárá'ó káráwiyaiwaimba ímbo ta'ótóráámba áúkaawe. Mindásafe'a miwí táái ímba ísáaro.

#### **Káráísitinte'a kááísatinkena aúí'o uwátínkarain-aii.**

<sup>20-21</sup>Ísu Káráísitimo pukáintemba kembiwí wemó uráintembo uráamba waántá-waasiti aambá arááíwauwana minánkó ta'ótokompinkemba Káráísiti faútínkaraiye. Marapákén-kwáásí aambó fáí'makaan-tontafesa sésa ímba né'a ímba uwá'namai awáné'a ímba ta'óto'mai awánaaro sen-ááímá nóra séra wéaraaiwaeo. <sup>22</sup>Minááímá waásiti imáyáafinken-aaima marapákén-tántáá'á póna náiyamba úwoi násuwanaawe. <sup>23</sup>Miyán-áái sésa wíyómpaken-kisau-waasi-imayaa mósá marésa karo'á sésa waási sáwísamban-iyé sésa kentú-aoisamba wíyóro sewasá tuwímbai tuwánésa karo'á sésa kawé'-ímáyááwáráwín-owe sembánifo miyán-ámbó

arááíwáemba sáwí-imayaasafesamo tirááisafesamo ombá ímba kanaa'á maisuwáinana tai'áínifo úwoi waé'wae'a íniye. Mindásafe'a ímba kawel'-ímáyááwará'-wáásín-owe seró.

**3** <sup>1</sup>Maníkó kembiwí íyáfasitinkena Ísu Káráisitinka'a kááísatinkena aúí'a uwátinkaraimba pó'a wíyómpaken-tantaatafe'a imáyáa é'a aamoí é'a Káráísiti Maníkón-ayáánúrapa'a fasi'aén-áémpá'á mérain-aempaken-tantaatafe'a imáyáa é'a aamoín-oro. <sup>2-3</sup>Púwón-kwaasimo imáyáamo ímbo ontembá kembiwí miyáumai marapákén-tántáá'á ímba imáyáan-oro.

Ísu Káráísitiye'o kááísamaimo méraamba Maníkó miyáumai wentáféna fasi'ámai mérawaiwe séna wégarawiyiye. Mindásafe'a marapákén-tántáátáfé'a ímba imáyáa é'a wíyómpaken-tantaatafe'a imáyáa úmae íyóro. <sup>4</sup>Ísu Káráísiti aúí'a úmai méraawini áwáugoma pó'a kumíndara'a wesé'a mé'a fí'ora-sagaen-aempa'a méranaawe.

#### Aúí'a uwátinkáfa'a wéiyiyemo siyáin-aai.

<sup>5</sup>Mindásafe'a tai'áíndasafe'a sáwí-tantaatafe'o tirááisafe'o wéowanamo wétafisin-tantaa'a túwáaro. Mindá maarán-tántáá'án-iyé. Maa'u-tántáá'ó owíyé tigaesáfé'o owíyé sáwí-tantaatafe'o tirááisafe'o

owíyé túrande-urandemo owíyé miyámó ombá túwáaro. Túrande-urandemo owí marapá-tántáátáfésa aamoí ésa Maníkóntáfésa ímba aamoimó wéomba túwáaro. <sup>6</sup>Maníkón-aai ímba ísámai kawé'ó ombá miyá-sáwí'á wéomba póna Maníkó aaisambá séna sáwí-meyamba timíniye. <sup>7</sup>Ááema kewará'á miyá-sáwí-ámbá arááíwae'a miyá uráawe.

<sup>8</sup>Miyá umbánifo káfé'a tínaaemba uwáméro. Mindá maarán-iyé. Aaisambó sewíyé tíyántafesamo owíyé sáwí-tirumbo márááwiye símaimo sáwí'o uwátinkááwiye sáwí-aaimo sewíyé miyán-tántáá'á tínaaemba uwáméro. <sup>9-10</sup>Sáwí-waasi mére'a miyá-sáwí'á uráambanifo é'a ifátuwe'a aúí'a úmai mé'a Maníkóní áwáumo kawel'-úmaimo awánáyantafena wenkáání'a úmai aúí'a uwátinkena miyáumai aúí'a uwátinkáfa'a wéiyifo kempínkémbá karo'-ááímá ímba seró. <sup>11</sup>Maníkó miyá uráintafena maarán-ááímá ímba aifaráán-ááín-iyé. Tuwímbai Yúndaa-waasi owasá tuwímbai fí'onkaa-waasi owasá túmo káramaimo araénáémbo owí owasá tuwímbai ímbo túmo káramaimo araénáémbo owí owasá óraa'-amo'nafaken-kwaasi owasá wayó-kísáúmó máén-kwaasi owasá úwoimo méraan-kwaasi owasá miyá wéfo minááímá ímba aifaráán-ááín-ifo Ísu Káráísiti aifarí'a éna wení waási seyaafáímpá'á méraiye-aai aifaráán-ááín-iyé.

<sup>12</sup>Maníkóní waási-i'a owaná arumbá tiména simámarena séna kemparí'a uráamba pó'a maará íyasa tuwánánáawe. Tiruntafé'a é'a kawel'á uwátinke'a kentúma ímba maimaé iyé'a faru uwátinke'a

umbai-tántáá'ó wérainpimba fasi'ámaimo méraamba ímba ifátuwe'a <sup>13</sup> ímba nóraraamba aaisambá sé'a tuwímbaimo sáwí'lo uwátínkémba ímba imáyáa é'a anondáa miyán-oro. Fasi'aénkó kentí sáwí-imayaamo maitiyuwéna ímbo anondáamo sáwí-meyambo tímíntemba kembiwíwárá'á miyán-oro. <sup>14</sup> Miyámó ombá kembiwífímbá seyaafáímpá'á tirumbá wétime'a miyámó é'ó é'a mimbórá-ímáyáa wée'a miséyááfá'-ááisáfé'a kawé'-úmai méranaawe. <sup>15</sup> Mimbórá-ákúni'a úmai mé'a aáno úmai méraiyanafena Maníkó simámakaimba pó'a Ísu Káráisitimo farumó uwátínkáimba kentáásirumpimba waé'wae'a ínkwaé-imayaa é'a súwiyo seró. <sup>16</sup> Ísu Káráisitini fí'oka'ma'mai-aigo kentirumpimbá óraa'a íno. Kembiwífímbá kawé'-ímáyááfínkémbá wenáái mósímam-besímamba úmae wéiye'a arupise uwátinke'a Maníkémpá'á súwiyo wése'a Maníkón-aai aúfáífimbo agaimakáan-aaima sé'a imá sé'a Maníkóni ámútanko simátímakain-ima sé'a Maníkontáfé'a tirumpin-ámóí wée'a imá seró. <sup>17</sup> Kísau mo wémae'lo aaimó sembá Fasi'aénkó Ísuni fasi'aéntámbá miyá wée'a wemá kembiwísé'a méraintafe'a Maníkó kentáásifompa'a súwiyo seró.

#### Aarakwá'é tíráá'marine miwí táái.

<sup>18</sup> Aaresómbá ísáaro. Fasi'aénkóndén-oyo kentuwaai-táái ísáaro. <sup>19</sup> Waaimá ísáaro. Kentuwaainíntómbá tirumbá timé'a ímba sáwí'a uwátinke'a kawé'á uwátínkáaro. <sup>20</sup> Iyámpói-inaamaru ísáaro. Seyaafá-tántáátáfé'a kentinófoi-taai ísáaro. Miyámó íyanamo éna Fasi'aénkó aamoí íniye. <sup>21</sup> Iyámpói tifoísái ísáaro. Kentí iyámpóimo arupise uwátinkanaemo sembá kentí iyámpói sáwí'a úmaesa íyófo-imayaamo é'a ímba sáwí-aaifinkemba síyasa miwí týámba oro.

<sup>22</sup> Wayó-kísáúmó máén-kwaasi ísáaro. Seyaafá-tántáátáfé'a kentí óraa'-waasi-taai ísáaro. Miwí túranka'a aamoí uwásinkaiwae aantemba ímba miyán-káwé'á wée'a úwoi-kanaawara'a miyán-káwé'á é'a Fasi'aénkóntáfé'a táátafe-imayaa wée'a kentí óraa'-waasiti kísausafe'a ímba kae'-ímáyáa é'a kawé'-úmai máéro. <sup>23</sup> Kísau mo wémae'a sé'a ímba kesí óraa'-waasiti kísau aantembanifo Fasi'aénkóni kísau wémaumne sé'a kawé-kísáú wémae'a kawé'an-oro. <sup>24</sup> Miyámó wéomba maarán-áái imáyáan-oro. Fasi'aénkó wení waásisafena to'mayaambó úmakaimba mimbéyámbá tímíniye. Fasi'aénkó Káráisiti kentí óraako-úrumba ména kentí méyámbá tíména <sup>25</sup> sáwí'lo uráawi sáwí-meyamba tímíniye. Ímba tuwínkaa'-úmai-meyamba tímínifo arupise úmai-meyamba tímíniye.

**4** <sup>1</sup> Wayó'-wáásítí óraa'-waasi ísáaro. Kentí wayó-kísáú-wáásiyá'á arupise úmai kawé'-úmai káráwiye'a maarán-áái imáyáan-oro. Miwítí óraakoe kentí óraakoe mimbóráwígómá éna wíyómpa'a méraifo arupise úmai káráwiyo.

**Inai sésa arupise ésamo on-áái.**

<sup>2</sup>Seyaafá'-wáási ísáaro. Inai símae wéiye'a miyámó wéomba ímba fi'o-fi'on-imayaamo íyamba inaimó sen-ímáyáá é'a Maníkómpá'á súwiyo seró. <sup>3</sup>Inaimó wésemba kentáásáfé'wara'a súwa'nai e'a seró. Maníkómbá áisai íyana aambá wiyínata ásé-aaisa simátimenaumne. Minááímá aúpá'á makéna aráátímakaimba minááígóní áwáuma Ísu Káráisitiniye. Aúpá'á makéna aráátímakain-aaimo simátimewandarakemba aaisambá siyésa ándáfa'a mósínkaraawe. <sup>4</sup>Maníkó minkísáú símakowa'a maiyáundanifo wenáái afora'ó simátíméndasafe'a súwa'nai e'a inai seró.

<sup>5</sup>Maníkómpá'á ímbo taméeraan-kwaasífimba kawe'-ímáyááfínkémbá kawe'-úmai mé'a kanaamó wéraindara'a miwífímbá Maníkóní kísau maimaé íyóro. <sup>6</sup>Aaimó wésemba sásá-ááiye ásé-aai aantemba wésemba pósa tísai íyamba anondáámo simátimiyanaaima ímba saafá é'a ásé-aai aantemba simátíméro.

<sup>7</sup>Kentáásí waásigon-awi'a Tíkíkaasi wen-ímáyáá wéundawi kentópa'a wéména kesáái seyaafá'á kosimátiminiye. Kesáámó úndantemba Fasi'aénkóní kísau-waasi ména minkísáú ímba ifátuwena kawe'-úmai wémaena <sup>8</sup>kentáásáái kosimátiména fasi'átinkaindasafe'a ai'maráúnana kentópa'a wéména wíniye. <sup>9</sup>Moóráwigo kentí naaópakewin-awi'a Ónísímasi wemá kentáásí waásigo éna wen-ímáyáá wéundawi kawe-kísáú wémaiwai wesé'a wémesarai kentááfímbó paápé uráin-tantaakon-ai kosimátimeyaaye.

<sup>10-11</sup>Moóráwigon-awi'a Árisítakasi kesé'o ándáfa'o méraiwai kembiwísáféna séna kawe'-úmai méraaro sisaná Páánápáasi anááfáigon-awi'a Mááka kembiwísáféna séna kawe'-úmai méraaro sisaná moóráwigon-awi'a Yósúwa moórá-awi'a Yásítasi kembiwísáféna séna kawe'-úmai méraaro wésiye. Aneka'á maanááímá simátiména sune. Máákaamo kentópa'o wéména wíndamo é'a kawe'á uwánkára sune. Yúndaa-waasi Ísu Káráisitiniye'o kááísamaimo méraampinkemba minkáúmbó-wáási aantemba kesé'a kísau wémaesa Maníkómó káráwiyaipa'o waásimo méraiyantafesa kesé'a kísau wémaesa wéfasi'asinkaawe.

<sup>12</sup>Moóráwigo kentí naaópakewi-awi'a Épáfarasi kembiwísáféna séna kawe'-úmai méraaro séna wemá Ísu Káráisitini kísau-waasi éna kembiwí túwa'nai ena fasi'ámai inai símae wéiyena Maníkómpá'á maarán-ááímá wésiye. Maníkón-aai fasi'ámai ta'óto'mai kawe'á é'a Maníkómbó arááímó táínda-i'a seyaafá'á wé'e'a táákaefaen-kwaasiyaamba úmai fasi'ámai



méraiyantafena mindásafena inái wésiye. <sup>13</sup>Kembiwí Kórósi-naopaken-kwaasiye Réóndísiyaa-naopaken-kwaasiye Írápórisi-naopaken-kwaasiye túwa'nai índasafena óraa-kisaumo wémaimba awané'a simátimune.

<sup>14</sup>Moóráwigoon-awi'a Rúku wen-ímáyáá wéundawisa kentáási tíyofain-kwaasi éna kembiwísáféna séna kawe'-úmai méraaro sisaná moóráwigoon-awi'a Tímasi kembiwísáféna séna kawe'-úmai méraaro wésiye.

<sup>15</sup>Maníkóní waási Réóndísiyaa-naopakewisafeta séta kawe'-úmai méraaro séta Maníkóní waási Nímpaani naaúmpa'o túwaandu owísáféta séta kawe'-úmai méraaro súnda kosimátíméro. <sup>16</sup>Maanáúfáífínkén-ááímá toráumai síya'a seyaafá'á ísásuwe'a ti'maráiyasa maimaésa Maníkóní waási Réóndísiyaa-naopa'o méraawi mátimiyasa toráumai ísáaro. Miwísáfé'o tímakaunda-aufai timíya'a mimpínkén-ááímá ísáaro. <sup>17</sup>Moóráwigo Ákípaasimba simáme'a sune. Fasi'aénkó ámakain-kisau fasi'ámai wémae tai'aaó siyé simáméro.

<sup>18</sup>Ayáiyá'á kemá Póro agaimaráúmpo toráumai awíyé'a wenayáanaufi'an-ifo wenááin-íye sé'a ísáaro. Kemá Póro sune. Kawe'-úmai méraaro sune. Kemó ándáfa'o méraunda-imayaa wée'a Maníkómpá'á inái símae íyóro.

Maníkó úwoimo wétuwa'nai-intafe'a inái sune.  
*Kemá Póro súnda-aai tai'áíye.*